



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir yimyim TAPAK 10



Russia-Ukraine tsungta yimjung ken o jembidaksüner: Jinping

Shane Warne atema state funeral March 30 nü agitsü



VOL. XIX NO. 146 (ADOK 146) DIMAPUR YANGTEPNÜ (THURSDAY) METSÜREMI (MARCH) 10, 2022 ₹ 5.00

NLA Deputy Speaker indang election agitsü

Dimapur, March 9, 2022 (TYO): Nagaland Legislative Assembly (NLA) Speaker ajanga March 19, 2022 nü Deputy Speaker indang election agitsü telemetba agiogo ta Commissioner & Secretary, NLA, P.J. Antony-i metetdaksü.

NLA Deputy Speaker atema March 14 & 15, 2022 anogotem anepdang 11:00 ako nugi

nikongdang 03:00 ako tashi nung nomination papers agitsütsü akok.

Iba sülen March 16, 2022 anüngdang 12:00 ako nungi nikongdang 3:00 ako tashi nung tenüing meyipa agitsü akok aser March 17, 2022 nü kulikakettem reprangtsü aser March 19 nü election agitsü ta Commissioner & Secretary-i ashi.

Nagaland MLA temi Agreed Position atema noktaksüla

Dimapur, March 9, 2022 (TYO): March 9, 2022 nü Consultative Meeting nung onok malidang telemetbatem agiogo, ta NPCC President K. Therie-i ashi.

Naga yimjung maparen nung India sorkar aser Naga National Workers tsungda tenangzüktep ana lir aser itemji Framework Agreement o Agreed Position lir ta onoki senden nung shiogo, ta pai metetdaksü.

"Nagaland sorkari Nagaland nung alirtem ajangzüksüba tenangzüksüba atema dang jembitsüla aser ibaji Working Committee den Agreed Position lir. Nagaland nung MLA 60 prongi

Agreed Position mapa kuma inyaktsü atema rongshitsüla" ta K Therie-isa ashi.

"Naga nung aliba tesemtem ka kuma lokteptsüba onük mali süra, asenoki tanga state tem atema telemetba magitetsü. Asenoki lemte nunga parnoki magizüksü aser parnoki asen asoshi lemte nunga asenoki memolungtsü akok. Anungji MLA 60-i Nagaland state nung alirtem atema bilemetsüla" ta paisa metetdaksü.

"ULB elections atema onoki ashishitep kecha mali aser Supreme Court-i tuyuba ama inyaktsü molungtepogo" ta NPCC President-isa ashi.

APC Kikheto-i 13th Bio-Diversity Festival nung aden

Dimapur, March 9, 2022 (TYO): North East Network (NEN) ajanga 13 buba Bio-Diversity Festival nung Agriculture Production Commissioner (APC), Nagaland, Y. Kikheto Sema IAS-i tetushi süa jaoker ka ama shilem agi.

Iba benjung ya NEN Resource Centre, Chizami, Phek nung ayongzüka among.

"North East Network (NEN)-i mapa tajung inyaka aruba atema tenüngsang agitsü. NGOs külemi longjemer inyakba ajanga northeast state tem nung süngdong-lidong aser arem shiruru wazüka ayutsü tangatetba agitsü" ta Kikheto Sema-i ashi.

Tawa pai Noklak semdangdang tetsürtemi metsüjang wazüka ayuba angudang kanga temolung asü ta Kikheto-isa ashi.

2023 küm "Year of millets" ta ser amongtsü aser "Axone", "Anishe" o zükolak akongba amala chiyungtsütem asoshi G.I tag agitsü junger, ta paisa shisem.

"North-East state temi süngdong-lidong aser arem shiruru mapang talang ka wazüka arur. ajüsüaka tanü rongsenketzung renloksü atema inyakdang item rongsen agitsüsa akümer. Terenlok mapa inyakdang lipoküm wazüka ayutsüba mapa meinyakra takoksa jenti bentsür arutsü" ta Kikheto-isa metetdaksü.

"Phek district nung alirtemi tangalen nungi ak bener aruba noktanga amala inyakim ajanga rongsenketzung renloksü merangba atema tenüngsang agitsü. Nagaland nung sorkari gari

lenmang tajungba kümdaksüba atema pelar aser iba ajanga state ajungalen tsünüsenbongtsü tetsükdaksü melii bener senzütetsü" ta paisa ashi.

"NGOs, FPOs aser FIGs ajanga sorkari subsidy aser Grants agitsüba meshitsüla. Agriculture Infrastructure Fund (AIF) ta ser scheme tasen ka tenzüksü aser iba ya Post Harvest Infrastructure nung rangloker inyaktsü. Iba nung India sorkari NABARD aser Bank ajanga interest subvention loan agitsütsü. Yashi Prime Minister aser Finance Minister na den online ajanga senden amendang post-harvest infrastructure indang jembio" ta APC Nagaland, Kikheto-isa metetdaksü.

"Aluyimba nungi tenzüker tsünüsenbongtsü ayokba nung Naga tsürtemi tongtipang shilem agir. Iba ajanga yimtsung nung alirtem lokti aser rongsenketzung nung temelenshi angur. Loktiliba melenshiba nung tetsürtemi shilem tulu lir aser kibong ka nung tetsürtemi rongsenketzung tajungba kümdaksü" ta paisa ashi.

"Dimapur nung Organic AC Market ka lapoka lir aser iba ya Agriculture Minister, G. Kaito Aye lenisüba nung lapokba lir. Iba market ajanga tsünüsenbongtsü 330 MT tashi yoktetogo aser teimbale Phek District nungi bener aruba liasü" ta paisa metetdaksü.

13 buba Bio-Diversity Festival nung tongtipangtiba shilemji Heritage Seed Exchange liasü aser iba nung Nagaland nung yim balala nungi tetsür aluyimertemi shilem agi.

COVID-19 Nagaland: 4 dak putet, 2 taneptsü angu

Kohima, March 8, 2022 (TYO): Nagaland nung Bodbarnü nisung 7 dak COVID-19 putet aser 2 taneptsü angu.

Tanü Dimapur nung nisung 7 dak putet aser taneptsü angurtemji Dimapur o Mokochung nungi

nisung kaka lir. Nisung 35,441 nungi 33,135 taneptsü nguogo aser ibaji taneptsü angur 93.49% lir.

Nagaland nung tang nisung 67 anepaludar saka parnok 60 dak shirangba yimya kecha mali.

Naga nungeri tetsür nem 33% lezmükja ULB elections agitsü molunger

NAGA YIMTEN OLEMTEPERTEMI NÜBORTEMI AGINÜBA AMA INYAKTSÜLA

Kohima, March 9, 2022 (TYO): Bodbarnü Kohima nung senden amendang Naga kin teloktem dena nisungtemi Nagaland nung tetsür nem 33% lezmükja Urban Local Bodies (ULBs) indang election agitsü molunga agizükogo.

"Constitution of India indang 74th Amendment Act nung aliba ama ULBs indang election agitsüla" ta tanü bangzüngtep.

Iba senden ya state sorkari State Banquet Hall nung lokti tentet balala, arogotem, kin hohotem, political parties aser NGOs den külemi amen.

Nagaland nung ULB elections tesüsabuba agibaji 2014 December nung liasü.

Tanü senden nung Chief Minister Neiphiu Rio aser Advocate General of Nagaland K N Balgopal nati 74th Amendment ya khenyongi balaka lir ta metetdaksü.

"Naga nungeri tetsür nem shilem lezmükja ULB elections agitsü molunga agizükogo" ta senden amenba sülen government spokespersons - Neiba Kronu aser Mmhonlumo Kikon nati osangbener dang ashi.

Nagaland nung tetsürtemi tanü senden nung tetsür nem 33% lezmükja ULB elections agitsü lemteba atema pelar, ta Planning and Coordination, Land Revenue and Parliamentary Affairs Minister, Kronu-i ashi.

"Iba ya Nagaland atema otsüsüsü anogo ka lir kechiyong nisung ajaki molunga agizükogo aser iba ya state renloksü atema nüngdaker" ta IT&C, Science & Technology and New & Renewable Energy Advisor, Mmhonlumo Kikon-ia ashi.

Nagaland state sorkari ULB elections magitetba ajanga Supreme Court-i tawa tu hopta trok tsungda tetsür nem shilem lezmüktsür ULBs election agitsü inyakim latetsü tetuyuba agüja liasü.

ULB elections kodang agitsü ta osangbeneri asüngdangdang "maparen tembangba sülen agitsü" ta Mmhonlumo-i langzü.

"Tanü senden nung kin hohotemi lemte agizükogo. Senden nung adenertem ajaki khen dang masü saka anaben tashi teka mekanga agizük" ta pai shise.

"Senden nung adenertemi

tetsür nem shilem lezmüktsüba aser municipality temi tax agiba dak sendakba onük kar asüngdang aser itemji rasa ashiba sülen parnoki lemte molunga agizük" ta paisa metetdaksü.

ULBs kübok toll tax aser merükmejuba indang tax ji municipal/town council züngsemtem dak keta lir aser tax sarubaji state sorkar nem masü saka council temi

pei pei tesem renlokba mapa nung amshitsü ta taoba mapang Chief Minister-i ashiba olen tanü Advisor Mmhonlumo-ia nenshia metetdaksü.

Tanü senden nung adenertemisa Naga Political Issue (NPI) nung olemteper ajak dang nübortemi tekaraba nung yimten latetdaksünüba angatsü mepishia metetdaksü.

Nisung ajaki telatetba ka aser tenangzüktep ka agitsü atema telongjem aser tangatetep kati arutsü mepishir ta senden nung adenertemisa ayongzüko.

Mongulbarnü Naga National Political Groups (WC NNPGs) indang Working Committee-i state sorkar dang state ketdangsuba nung temolung agitsütsü aser Naga yimten olemteper ya olemteper nem yutsütsü metetdaksü.

"Naga teloktemji olemtepertem lir saka asenok ajak iba nung sendaktepa lir" ta Minister Kronu-iba atema ashi.

"Naga yimjung maparen nung state sorkar ya teyariteper ka lir. Onoki süoki ia bilemer aser asenok kobika jembia aotsü. Election agitsü lia dang 'No solution No election' ola adokra kang menuadoker asütsü" ta pai metetdaksü.

"Nüborntemi yimten yakta latetdaksünür aser nisung ajak iba onük nung sendaktepa lir. Naga civil societies-i lokti sendentem ayonga amentsüla aser Naga nungeri ajak den külemi inyaktsüla, iba nung olemtepertem dena lir" ta Kronu-isa ashi.

Naga nungeri tekaratiba nung yimten latetsü atema kobika mepishitsü ta osangbeneri asüngdangdang "October 15, 2020 nü iba onük atema olemteptsü senden ka ayong saka iba mapangji Nagaland nung political party tongti- Naga

People's Front (NPF) aser tanga political party kar maden" ta Minister-i langzü.

Ajisüaka, tang opposition maliba United Democratic Alliance (UDA) sorkar akümba sülen September 2021 nung iba mesükba senden ka ayonga amendang nisung ajaki tekaraba nung yimten latetsü molungtepa liasü, ta pai ashi.

Sangküm February-March tsungda state assembly election agitsü lir anungji 'No Solution No Election' ola agitsütsü asü masü ta osangbenerisa asüngdangdang "asenoki kechi inyaktsüar tekaraba nung inyaktsüla" ta Minister Kronu-isa telangzüba agitsü.

Brihostibarnü Chief Minister, Deputy Chief Minister aser UDA Chairman nungertem Delhi-i aotsü Union Home Minister Amit Shah den ajuruteptsü, ta paisa metetdaksü.

"Tangbo iba ya temepishiba ka dang masü saka Naga nungertemi tekaraba nung yimten latetsü ola adokba tashi angang ta ashir" ta Advisor Mmhonlumo Kikon-ia ashi.

"Tanü amenba senden ya balaka lir kechiyong wadang ajak nungi Naga lennirtem adenshiogo aser olemteper nung adenba telok ajak dang tekaraba nung yimten latetsü mepishio" ta paisa ashi.

"Naga yimjung olemteper nung state sorkari tiyongtsü nung teyariteper ka ama mapa aika meinyakteter, anungji telok aser lennir balala den ajurutepe tebilemba lemsateptsüba kanga tongtipang. Item amala senden ajanga nüborntemi ola adokba olemteper tenarong atongtsü" ta Advisor Mmhonlumo-isa metetdaksü.

Tanü senden nung telemetba agiba nung Chief Minister Neiphiu Rio, Deputy Chief Minister Y Patton aser United Democratic Alliance (UDA) chairman T R Zeliang nungertemi sign süogo, ta paisa shisem.

Tanü amenba senden nung kin hohotem, civil societies, tetsür aser kaketshir teloktem nungi lennirtem den shisashir züngsema nisung 160 tema aden. Senden nung mendenji Minister Kronu liasü aser Advisor Mmhonlumo Kikon o NPF MLA Yitachu nati yaritep.

NE nungi tetsür 16-i 'Best Women Vaccinator Awards' angu

New Delhi, March 9, 2022 (Agencies): India nung state aser Union Territory (UT) 36 nungi tetsür vaccinators 72 nem 'Best Women Vaccinator Awards' agitsüo.

Iba sempet ya Mongulbarnü Union Minister of Health and Family Welfare, Dr Mansukh Mandaviya-i New Delhi nung agitsü.

India nung Covid-19 Vaccination Programme takok ngua inyakba nung tetsürtemi shilem tajung ajiteta iba sempet

agitsü.

Tesür 72 rongnung Northeast nungia tetsür 16 densema lir.

Parnokji Arunachal Pradesh nungi Aroty Tayeng o Yatam Talom; Assam nungi Rupjan Begum o Dipali Chasa; Manipur nungi Chingngaihman o Memi Devi; Meghalaya nungi C Marak o EV Pahsyntiew; Mizoram nungi Lalhnekhimi o Vanpangpari; Nagaland nungi Keneingunuo Angami o K. Kushen Khiam; Sikkim nungi

Yangkila Sherpa o Pema Lachungpa aser Tripura nungi Sajali Dhali o Sarmistha Bhowmik nungir lir.

"Health sector renlokba nung tetsürtemi shilem tajung agibaji kanga tongtipang. ASHA aser ANM employees ya health-care system nung tongtoret lir. ASHA employees-i kanga anibeleva linük tenzüker. Temsüa alir ajak vaccine agitsü atema parnoki senzüogo" ta Dr Mansukh Mandaviya-i ashi.

Kewhimia Peli No. 13 pur Sekrenyi-cum-Get-together amung



March 9, 2022 nü Sekrenyi-cum-Get-together sentong agidang tangokba noksa nung Kewhimia Peli No. 13 züngsemtem angur.

Kohima, March 09 (TYO): Kewhimia Peli No. 13 pur Sekrenyi-cum-Get-together 2022 sentong ka Khriesanuomia Badze, Pfuchatumia Khel, Kohima village nung March 9, 2022 nü munga liasü.

Sekrenyi ya Angami-Naga nunger atema tongtipang benjong ka lir, aser iba

benjongmung nung tesendaktep tali akangshia yanglur.

Kewhimia Peli (peer group) No. 13 Sekrenyi-cum-Get-together ya Kohima village nung aliba kiyong pezü - Pfuchatumia, Tsütuonuomia, Lhisemia aser Dapfüsumia nungi züngartem lungjemer amungba benjong ka lir.

Küm shia iba benjong ya kiyong shia nungi Peli No. 13 temi melentepa ayonger aser taküm P Khel indang Kekhotakhrie Peli No. 13 ajanga ayongzüka liasü.

Pfuchazounuoko ajanga sentong nung tetsü-tebou ken aten aser pelatepa Sekrenyi benjong chiyonga munga liasü.

NERC ajanga Public Hearing sentong ayonger

Dimapur, Metsüremi/March 09 (TYO): Electricity Act, 2003 indang Section 62 kübok mela aliba ama Nagaland Electricity Regulatory Commission, Kohima ajanga March 16, 2022 nü Public Hearing sentong ayongzüker.

Iba sentong ya Ganeshnagar, Dimapur nung 10 MW Biomass Based Power Plant amenoktsü aliba nung Tariff angateteptsü asoshi M/s. Hutah Industries Private Limited, Dimapur ajanga Commission matsüngdang Tariff

Petition file asüba nung Public Hearing alitsü asoshi ayongzüker, koba Engineering-in-Chief, Department of Power, Nagaland indang Conference Hall nung anüngdang 11:00 ako nungi tenzüksü.

Iba Firm ya ajanga February 15, 2022 nü English osangkaket asem nung Summary of Petition adokja liasü. Firm ajanga stakeholder dang Secretary NERC nem February 28, 2022 tashinung agütsütsü atema 'suggestions/objections' meshia liasü.



DRDA Mon ajanga March 9, 2022 nü DRDA Resource Centre, Mon nung district level training aser VDBs manual book sayaba sentong ka ayongzüka agia liasü. Iba sentong nung DPO, DRDA Mon, T. Manhom menden liasü aser PD, DRDA Mon, Pfukrulhou Koza ajanga RD Programme tem metetdaksü aser VDB manual book sayatsü.

District balala nung International Women's Day amung



Sakus Mission College, Dimapur



PHQ KOHIMA

Dimapur, Metsüremi/March 09 (TYO): Sakus Mission College, Dimapur nung March 8, 2022 nü International Women's Day munga liasü.

Women Development Cell-i anir tetsürtemi tekolok shisatsü aser shi nung tashi aitba benjonga iba anogomung ya taküm omen 'Gender equality today for a sustainable tomorrow' nung ajemdaker munga liasü.

Iba sentong nung alakteta jaoker ya fashion designer Bambi Kevichusa liasü. Lai iba benjongmung sentong nung jembiba mapang tetsür aser tebur memedemdangtsüla saka kati ka tenüng asangtsüla aser ibaji ajanga tarutsü atema külemi inyaktetsü, ta ashi.

Lai 'Power of One' onük nunga kongshia jembiba aser alima tajungba mesüra tamajungba kumdaktsütsü asoshi nisung shia dak tashi lir, ta shia liasü.

Asenoki inyakra nisung katia temelenshi bener arutsü, ta lai ashi.

Iba sentong nung 4th Semester nungi Marlin menden liasü, WDC tetsür züngsemtemi temeja ken ka aten.

6th Semester nungi Martin-i pai mejemba sangru ka azüng aser college Principal Asenla Yanger ajanga lokti ayongzüka liasü.

Maneni Bolito Achumi, Assistant Professor ajanga tepela o jembiba liasü.

LONGLENG : Longleng District Administration aser Mahila Shakti Kandra-District Level for women aser PBCA Woman Department, World

Vision Longleng aser One Stop Center, Longleng lungjemer March 8, 2022 nü International Women's Day celebration cum Folk Dance Competition sentong ka "Gender Equality Today for a Sustainable Tomorrow" omen nung ajemdaker BPCA Convention hall, Longleng nung agia liasü.

Iba sentong nung tongti tesemdanger, Programme Executive, All India Radio, M. Lemjan-i jembiba mapang, kanga kera melenshia ainba lima ka nung tetsürtemi shilem tulu agir, ta ashi.

Tetsürtem rongnung sempet aser yimya balala lir, saka lokti asoshi ajaki tajung ka-kabo inyakttsüla aser pei sempet metettsüla, ta lai ashi.

Tang tashi gender equality shidak mamshir. Shisaliok shidak maliba, mapa inyakttsü maongka peria maliba, mapa nung telemsa, temeden wazüka meyutetba, tamangba yimsü temeden, yimtenren temeden maliba ajanga gender equality mangur, ta lai ashi.

Tetsür aser teburtem rongnung tangatetba kasa alitsü nungdaker aser tetsür ajaki women empowerment ya pei jenjang metetba/angatetba ka lir ta metettsüla, ta Lemjan-isa ashi.

Sentong nung Deputy Commissioner, Longleng, M. Shayung Phom; Executive Secretary PBCA, Tialemba aser Project Officer, WV, Lalremthang nunger temia o tatsütsü jembiba liasü.

Iba sentong nung nisung 22 nem BBBP Awards agüija liasü.

President ENWO & Rtd DEO, Shamthai aser CMO Longleng, Dr. Obangjungla nungertemi lokti asoshi mapa tajung inyakttsüba atema Phenomenal Woman Award agüija liasü.

Sobaliba tsüngsang tetoktepba nung block pungoi shilem agia liasü aser iba tetoktepba nung Yongnyah block mezüng aser Shakai block tanabuba jenjang ngua liasü.

Moishen, PBCA aser Helaja Wung nati sentong nung temeja ken ka aten aser Phungla Phom, WWO ajanga tayongzüka o jembiba liasü. Iba sentong nung Angbhen, women secretary, PBCA menden liasü.

MON : Mon District Administration ajanga KNSK den lungjemer March 8, 2022 nü International Women's Day benjongmung sentong ka Konyak Nyupuh Sheko Khong (KNSK) Office, Mon nung agia liasü. Iba sentong nung omen ya "Gender Equality Today For Sustainable Tomorrow" liasü.

Iba sentong ya "Race for Equality" omen nung ajemdaker marathon race ka agia tenzü, koba KNSK tir Ponglem ajanga tenzüksü. Iba asemtepba nung Shamnyu Ward nungi Pongjem mezüngbuba, Ngipsho aser Ngonai nati tanabuba aser tasembuba jenjang nguteta liasü.

Iba sentong nung alakteta jaoker, SDO (C) Sadar Mon, Lithrila Sangtam, NCS ajanga tetsürtem dang pei kibong nung telemtetba agiba shilem tali agitsü ajungshia liasü.

Lai tetsürtem dang parnok ya tebur dang tashi maitba ta

mebilemtsü aser pei sempet nung tamang akatsü ajungshia liasü.

Iba sentong nung tongti o jembir, KNSK nung taoba tatong tir, Rebeka ajanga Mon aser Nagaland nung tetsürtem ajungtsü asoshi inyakba mapang tintem aser tebilemtsü ajurubatem lemsatetpa liasü.

Iba sentong nung Yangao Konyak menden liasü aser KNSK tir Ponglem ajanga tarur pela agizüka liasü. Maneni Y. Martha-i melepzüng o jembiba liasü.

PHQ KOHIMA : Nagaland Police Headquarter ajanga alima ajunga den külemi March 8, 2022 nü PHQ, Kohima nung International Women's Day munga liasü.

Iba sentong ya "Gender Equality for a Sustainable Tomorrow" omen nung ajemdaker munga liasü.

Iba sentong nung tongti o jembir Advisor, Naga Mothers Association, Dr. Rosemary Dzuviichii-i tetsürtem dang pei temeden asoshi raratsü aser loktiliba nung tetsür-tebur kasa alitsü atema inyakttsü ajungshia liasü.

Iba sentong nung alakteta jaoker aser PHQ nung senior officer temi 'SOPs for Crime Against Women' indang kakat tilaka saya.

Iba sentong nung tetsür staff trok - Orenboni Kikon, Asstt. OS, Branch-I, PHQ; Sedevinuo Sokha, UDA, INT; Kekhriesenuo Chuse, LDA, Branch-III, PHQ; Adono Kent, UBSI, INT; Lanurenla, Computer Operator, SCRB,

PHQ; Metsiseno, WPC, Cyber Crime PS, PHQ - nem sempet agüija liasü.

Maneni sentong nung INT nungi UBSI Tsuponi aser DBF Kohima nungi ASI Venus Kikon nungertemi Women Police shilem nung ajangshiba lemsatetpa liasü.

SP (HR&SJ), V. Achetla ajanga sentong nung adener pela agizükba o jembiba aser DIG (R), Deepali R. Masirkar, IPS ajanga tayongzüka o jembiba liasü. IGP (HQ), S. Tokiumong Yimchunger, IPS ajanga iba sentong nung o jembiba liasü.

Sentong nung Joy Thusi Fihtu, SP (MOD) menden liasü aser Preeti Malik, IPS, AIG (Co-ord) ajanga melepzüng o jembiba liasü. Maneni PHQ staff temi temeja ken ka aten. Iba sentong nung senior officer aser Women Police züngsemtem dena liasü.

PHEK : District Administration aser District Level Centre for Women-Mahila Shakti Kendra (BBBP), Phek ajanga District Hospital Phek, Department of Health and Family Welfare, Nagaland den lungjemer March 8, 2022 nü Phek District kübok Kotisu yimtsüng nung International Women's Day munga liasü.

Iba sentong nung shisalen sayur Dr. Ngopelo Keviechu, Senior Medical Officer (SMO), District Hospital Phek ajanga tetsür temang anema alitsü indang jembiba liasü.

Pai nüburtem dang District Hospital, Phek nung service balala agütsüba agitsü ajungshia liasü.

(Maneni tapak 3 nung...)

Tripura sorkari tetsür asoshi Rs 400 Crores lezmüksü



Tripura cabinet spokesperson aser Information & Cultural Affairs (ICA) minister Sushanta Chowdhury-i (Tiyong) Bodbarnü osangbener den jembidang tangokba noksa nung angur.

Agartala, March 9, 2022 (Agencies): Tripura sorkari tetsürtem tashi itdaksütsü atema 2022-23 financial year nung Rs 400 Crores endoktsü.

"Tripura State Policy for Women's Empowerment, 2022' kübok sorkari sen lezmüksüo.

Mongulbarnü Union Home minister Amit Shah-i Agartala nung lokti sentong ka nung jembidang Tripura state sorkar indang 'Women Policy 2022' lemtetba osang metetdakja liasü.

"March 5, 2022 nü council of ministers senden ka nung 'Women Policy 2022' inyaksü lemtet aser iba osangji yashi Amit Shah-i metetdaksüo" ta Tripura cabinet spokesperson

aser Information & Cultural Affairs (ICA) minister Sushanta Chowdhury-i Bodbarnü ashi.

"State sorkar mapa ajak nung tetsür nem 33% lezmüksütsü aser government market stalls & shopping complexes nunga tetsür nem 50% lezmüksütsü. Maneni, state sorkari tenzükba Venture Capital Funds nunga tetsür entrepreneurs nem senotsü 50% lezmüksütsü" ta Sushanta Chowdhury-i ashi.

'Women Policy 2022' atema Rs 400 crore lezmükja lir aser iba policy ya Social Welfare and Social Education department ajanga inyaksü, ta paisa shisem.

Süngolu nung mapa inyaker nem Rs 85 Crores lezmüksü: Tripura nung süngolu nung

mapa inyaker nisung 7000 tema nem social security agütsütsü nükjidong nung Tripura state sorkari Rs 85 crore alangba 'Mukhyamantri Cha Sramik Kalyan Prakalpo' tenzüksüo.

"Tripura nung süngolu nung mapa inyaker temi küm shia süngo seret lakh 90 tashi ayimer. Süngolu nung mapa inyaker 7,000 nungi 75% tashi tetsürtem lir aser tea estates 54 den tea processing factories 21 nung süngo yanglur" ta ICA minister Sushanta-i metetdaksü.

"State sorkari süngolu nung mapa inyaker nem anogoshia Rs 176 agütsütsü lemtet. Taoba mapang parnok nisung shia nem Rs 105 agüja aliba tang Rs 130 agütsüdar" ta paisa ashi.

Meghalaya HC-i chief secretary dang nakmati atuba anentsü tuyur

Shillong, March 9, 2022 (Agencies): Meghalaya high court-i state nung ozüing alema nakmati atuba atema tebilemstü abenba metetdaksüo.

Meghalaya high court-i chief secretary dang ozüing alema nakmati atuba maparen anendakjanga ta tetuyuba agütsü.

Meghalaya high court-isa

chief secretary dang Supreme Court-i ashiba inyaksü atema luden ka tentettsü tetuyuba agütsüo. Iba luden nung yimtenren nungi meinprong masütsüsa nübotem shimtsüla ta parnokisa ashi.

Meghalaya high court nungi judge asem adenba bench ka den chief secretary RV Suchiang nungertemi East Jaintia Hills district

sem dangba sülen iba tetuyuba agütsüo.

"Supreme Court ajanga tuyuba mapatem meinyakba ajitetogo. Ibaji nakmati atuba maparen repringshimtsüla" ta Meghalaya high court-i ashi.

Khliehriat meketa aliba tesem tuluka nung administration-i tenük meyoker, ta Meghalaya high court bench-i ashi.

District balala nung International...

(TAPAK 2 NUNGI...)

Sentong nung Jopokhuyi, IT OSC Phek ajanga Sakhi-One Stop Centre indang sentongtem lemsatepa liasü aser Veposelu Naroh ajanga Mahila Shakti Kendra indang teinyaksü lemsatep aser BBBP schemes kübok sentong balala indang shia liasü.

Field Response Officer, National Helpline for Senior Citizens, Nagaland,

Kekhriengunuo-ia teintet rogotem indang scheme balala lemsatepa liasü.

Tetsürtem aser yimsüing nung alirtem ajanzüksüsa iba ama sentong tajung ayongzükba atema Kotisu Village Council chairman, Vechita Tetseo-i pelaba lemsatepa liasü.

Sentong nung Vilen Kapu Thisa, Women Welfare Officer,

MSK Phek menden liasü aser Nusitalu, Women VDB, Kotisu village ajanga tarur pela agizükba o jembia liasü.

Avikuotho, District Coordinator, DLCW-MSK ajanga melepzüing o jembia sentong tembangba sülen angadi medical camp ka ayongzük, kong tetsür aser tanur 150 shi temang anepalua liasü.

Tanü Majuli by-election votes azüngtsü

Guwahati, March 9, 2022 (Agencies): Majuli District Administration-i 99-Majuli (ST) constituency indang by-election votes azüngtsü tema atema renema lir.

Chief Electoral Officer, Assam, Nitin Khade-i Majuli DEO den külemi votes azüngtsüba indang maparen meyipa repringshi.

"ECI-i lateta aliba inyakyim ajak benshitsüla aser counting hall shia nung COVID tetuyuba sülen anidaksüla" ta Nitin Khade-i ashi.

Majuli LAC indang counting centre nung three-layer security maparen inyakogo.

Commission-i votes azüngtsü atema RO aser AROs mapa lezmüksüo.

Brihostibar anepdang 8.00 ako nungi votes azüngtsü aser ECI website <https://results.eci.gov.in> nung round shia indang result sayutsü.

Election result ji Voter Helpline App nunga angutsü aser osangbener nem mapang shia osang agütsütsü.

Vice President Naidu-i Mizoram semdang

Aizawl, March 9, 2022 (Agencies): India Vice President M. Venkaiah Naidu-i Bodbarnü anogo ananü Mizoram semdangtsü atema Aizawl tonga aruogo.

Tanü anüingdang Lengpui Airport nung governor Dr. Hari Babu Kambhampati, health minister Dr. R. Lalthangliana, Rajya Sabha MP K. Vanlalvena aser tongyi ketdangsurtemi pa pelaa agizük.

Tanü nikongdang Vice President Naidu-i Raj Bhawan nung sobaliba sentong ka nung nung sobaliba sentong ka nung

Governor-i ayongzükba liasü aser Mizo yartsünsanger telok aikati shilem agi.

Mizoram Chief Minister Zoramthanga-i Vice President Naidu den senden amendang indang All India Services cadre balaka alitsü indang nenshia metetdaksü.

Brihostibarnü Naidu-i budget session tembangba anogo nung o jembitsü ta osang janga ashi.

Hokolbarnü pa Sikkim-i aotsü aser idakji Tarku nung Kanchendzonga state university yanglutsü atema lung aden. Iba sentong ya Mizoram azüngtsütsü.

Assam-Arunachal arrtsü anasa prangpong-injang angu



Dibrugarh, March 9, 2022 (Agencies): Assam aser Arunachal Pradesh arrtsü anasa aliba Malugaon tesem nung sepaitemi prangpong-injang aika ngutetogo.

Assam o Arunachal Pradesh arrtsü anasa Malugaon nung NSCN-KYA telungpurtem senzusenbongba osang tejangja ka angazükba sülen Army den Assam police

telok kati Bodbarnü mita ao. Iba mapang parnoki Malugaon tesem nung prangpong-injang aika ngutet.

Parnoki MQ 81 assault rifle ka den injang 136 rounds, 9 mm pistols indang 17 rounds aser detonators ana ngutet.

Iba ya Indian army aser Assam Police tsüingda yaritepa inyak, ta ketdangsur kati ashi.

Manipur elections atema JD (U)-i MP 5 yok

Guwahati, March 9, 2022 (Agencies): Brihostibarnü Manipur Assembly elections indang votes azüngba mapang tenük yoktsü atema Janata Dal (U)-i MP pungu tashi yokogo.

"Votes azüngba mapang tim masüba kar danga candidate temi shira, MP temi iba counting centre jakdang mener lungkak aittsü" ta JD (U) secretary general Afaque Ahmad Khan-i ashi.

"District Election Officers, RO/ AROs-i indangindanga

counting centres nung CCTV ajanga videography asütsü atema onoki ECI dangi shidi zülüogo" ta Khan-i ashi. Pa ya Northeast atema Janata Dal (United) party in-charge lir.

Taküm Manipur Assembly elections nung Janata Dal (United) candidate 38 toktep.

JD(U) candidate tem rongnung taoba Manipur DGP LM Khaute aser taoba police ketdangsur Th Brinda Devi na dena lir.

GOVERNMENT OF NAGALAND DIRETORATE OF TECHNICAL EDUCATION NAGALAND: KOHIMA NOTIFICATION

This is to inform interested candidates who wishes to study 3 years B. Sc. Hospitality and Hotel Administration, Diploma and Certificate courses under Institute of Hotel Management Catering Technology and Applied Nutrition, Mawdiangdiang, Mawkasiang, Shillong, that admission are open for the North Eastern region quota seats for academic session 2022-23.

In this connection, interested candidates for the above courses who fulfill the eligibility criteria may submit their application directly to the Institute. For further clarification candidates may visit: www.ihmshillong.nic.in or contact: Landline-(0364) 6033096588/ 6033096587, Mobile No. +916009244123

Issued by DIPR

(Er. M NAKRO)
Director.



TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 10, 2022

Proxy lima

Asen lima nung asenoki proxy indang kanga jembir, ibai asenoki yanglutetba tagitarutsü ka asünungbo alima nung asenok kanga nungtugu kümer lila. Ajisüaka, asenoki tetshiba 'proxy' yabo asenok asoshi tagitarutsü ka masü saka asenokang masü tarutsü putu dena akoksadaksüba mapaji proxy vote aser proxy tesayurtem ya asütsü. Proxy tetezü tangar temesüng nunger oshi nung, ' tangar melen inyaksüba' ta angatetsüa akok. Atangji, maparen kar nungbo ozüngia 'proxy' inyaksü melar saka asen lima nung inyakba proxy yabo ozüngi melatsüla mapa masü, ozüng raksaba mapatem lir. Iba indang tali tejangba angatetsü atema tawa Sema nunger kaketshir telongjem, All Sumi Students' Union (SKK), purtemi Sema nunger lushi nung aliba kaketrejtem shia nung proxy tesayurtem tan ita ka tsüngdasa mali küma anentsütsüla ta School Management Committte aser Headmaster-tem nem ozüngsa metetdaksüba mapaji bilemdangdi. Nübertem asoshi inyakba mapa ajak rongnung tongtibangtibaji kaketshisatsü angazükdaksüba ya lir, anungji government-ia kanga temulung agütsütsüba ser nung tesayur shimba maparen nungi tenzüker kaketreju anepaluba mapa tashi nung government-i government school mengudang aser memetet ser government ita sen chia akok tashi nisung teimba ayutsü merangba department-ang ka mesüka kümogo. Iba jagi, tazüngerbo mali ser government high school-ang aika kümogo. Ibaji mashikoshi inyakba mapa ka lir, kechiyong tazünger ali nung dang school teimba küma renloksü nungdaker saka tazünger mali ser high school teimba kümdaksüba jagi amajok nung government-i ita sen nisung aika nem agütsütsüsa akümer. Ibayongji, school aika nung tesayurtem mapa maka ser angati ita sen achir aser ano school aika nung pei melen tangar yoka inyakdaksür aser ita sen lemdanger tesadang ka agütsür. Tesayuri pei school ki mangu aser kenüdanga pei school nung kaketshirtem dang mesayu, ita sen tesadang ka pei melen inyaker nem agütsür, tesadang ka mapai mao ser pei lemzüka agibaji, arogo nung sannükeri arogo nung Tsüngrem o kenüdanga mesayudang ser, ita sen agizüka agiba den tepila kecha mali asütsü, kechiyong tesayur o sannüker na prongla nisung tsüngdang masü Tsüngrem tsüngdang sentsüh tulu lir. Naga nunger dak tajung aika liaka, ano pei agitsüa memetet tera agi tenük sünger mashimashi inyakba mapa aika lir. Item rongnung pei alidak government-i lapoktsüba kaketrejuji pei meyong kümer jungjunga anepaludaksünüba agi " Communitisation' sentong ajanga school shia School Managing Committee mesüra Village Education Committee ta shima yuja lir, ajisüaka school anepalutsü purtemi meteta pei school nung proxy tesayur nem sayudaksür. Iba tokolok aser tangatetbaji angatetsü kanga tasak. Ibaji peisasa pei akoksatsü inyakba matu aser yiar mapa ka lir. Pei chirnurtem asoshi lapoktsüba government school nungbo shitakba tesayur tajung nem sayudaksür masü saka tangar proxy tesayur nem sayudaksütsü aser school nungdaka mereprangtsü, sayuyonga ojang, mesayuyonga ojang, tezüngner züang mezüngner tezüng ta ser yutsütsü, saka külenbo timtema fee agütsütsüa mekoksümonga private school nung züngdaksütsü. Ajisüaka, kodang shitakba government school nung sayutsü shimba tesayurtemji reprangdangdir, government school shia nung school reprangtsü shimba committee purtemi ajungshia sayudaksü nungbo, manger sangwa nung private school-tem dang nungibo government school-temsa tajungba kümer alitsüba temoatsü aser takoktsü lenmang ana nung angutsü. Kechiba government school nung sayutsü shimba shitakba tesayurtem künep kanungbo jadena, School anepalutsü shimba committee purtemi sensaksem magir ta bilemer. Pei alidak government school shia arudakja tajung kümdaksüba jagi, talisa tsüraburtem kaketshisatsü angazükdaksüba nung pei chirnurtem dak sen meindoktsü, anungji shisamebulutsü aser fee magütsütsüta maksü majurutsü. Asenokbo, proxy inyaker masü saka asangsang nung shitakba aser chichia inyaker kaka kümdi. Proxy tesayur-a meyuli, proxy-a meinydaksüli aser proxy vote-a magütsüli. Asenokbo asen lima ya proxy lima masü saka shitakba peisasa pei mapa nung züngzünga inyakba lima ka kümdaksüdi.

OLEMSABANG Clean Election Yimyim

- Tayongtemjen Lemtur

(Yashi adok nungi...)

Lanur teinyaksü kar

NBCC aser ABAM ajanga seminar aser camping balala ayongzüker akar saka item sentong nung lanur aikati shilem magir. Lanurtem ya kanga tongtibang. Parnok ya social platform balala nung kanga sabua shilem agir. Anungji war room ajanga item lanurtem den tangatetba tajung agütsütsü nungdaker. Aser iba ya asenok telok ka tentetsü asoshi masü saka tenteta aliba telok Naga Block, The Nagas, The Naga Mirror, lanuri sabuba telok nung shilem agitsüla. Tatishitsü agi, Mokokchung, Kohima aser Dimapur shia nungi Aor lanur 50nem shimer social media nung shilem agitsü saka ajak opang ka nung shilem agitsü atema parnok nem koba tangatetba nung shilem agitsü aji jungjunga ashitsü. Nisung 150 agi tangatetba ka nung lemsatepdang, tangara tangatetba melenshidaksütsü ama bilemer. - Aowapang Ozüküm

Deobar sentep nung election atema jembitsü tajung saka target group matonger ta bilemer, kechiba süra Election nung ambangyim amshirtem sentepi marur! Anungji Arogo ajanga social movement ka tenzütsüla aser yangi Social media, weekly targeted group clean election yimyim metetdaksütsüla. Iba atema youth mobilize asütsüla. - Matsüng Pastor

Tanü alima anishidaksübaji IT world, media lir. Tat. agi, Instagram, Church YouTube, kentener YouTube e.g. Dreamz unlimited six lakhs merijang semer asem temai repranga anitaker. Item platform tajung amshia clean election indang angatetdaksüba ajanga nübur ajaki angateta nütsüng aika tajangzük ngudaksütsü ta bilemer - Amenla Mar

Clean Election Mitkar: Ashiba ama Election nung lanur ya tongtibang telok ka lir. Clean election tenüng nung lanur nübu tajung 30-50 tashi, shirnoki asen lima tejakleni odaktsüner, shimer 'Clean Election Mitkar' ta noktak nung ajungtsü. Iba telok ajanga election dak sentakba temenen anema social media nung tuteta sayutsü. Item telok ajanga ano 'clean election war room' tenzüng nung ajungtsü. Social media ajanga item telok yagi nübur nem tangatetba tajung agütsütsü akok. Kasa teloki election dak mapetba sentong aser mapa balala anema raratsü akok. Iba ya ABAM tetuyuba kübok arogo aser yimtsüng putu menden/samen menchen tazüokba nung Youth pastori anir inyak nung ajungtsü.

Media ajanga clean election asoshi jembitsüla: Election mapang Media platform ya kanga tongtibang. Media ajanga candidate aser party-i teinyaksü mapa nangzüka onüktem discuss asütsü akok. Yimsüsür ni adokra yimai inyaksü ta nangzüka koba tashi inyaket, koba nung tamakok angu aser mapa tasen asateta nüburtem asoshi inyak itemi asadangtsüla. Shirnok tata menden nung toktepner parnok nükla aser koma inyaksü itemji media ajanga ayimoktsütsü. Ano candidate joaka debate platform nung shilem agidaksütsüla. Lanurtemi item mapa ya inyaket nungbo temelenshi tulu bener arutetsü:

- Lanurtemi drama aser skit video yanglua social media nung upload sütsütsüla.
- ABAM youth ministry ajanga lanur nisung teshimtet ayutsü. Parnok WhatsApp group tentetsü aser mapang shia zoom mesüra google meet nung ajurutepa tangatetba agütsütsü aser clean election atema shilem agitsü.
- Taoba mapang ama clean election dak sentakba nung ken mejema atentsü.
- Yimtsüng shia arogo aser putu menden/samen menchen tetyuba kübok Youth Pastor-i anir "Clean Election Mitkar" (CEM) ta sür yim shia nung youth 30-50 (yim tulu nungbo 100 tema asütsü akok) tashi shimer mapa tenzütsü. Iba telok jagi sen alemba, yi amshiba amala election dak sentakba temenen anema social media ajanga tuteta sayutsü, public dang clean election indang angateta ashitsü, yimtsüng balala CEM telok den teka amteper ABAM tetyuba ama inyaksü. Clean Election ayonger ABAM youth department anir level asem nung CEM atema political education on Clean Election seminar agütsütsü (a) ABAM level nung, (b) Constituency level nung, aser (c) Yimtsüng level nung ta seminar ayong nung temelenshi tulu bener arutsü.
- Election nung sen agi vote malitsü ta candidate shia nem pledge yanglua sign südaksütsü.
- Couping system anema noktaktsü.
- Shir party/workeri tasa tamajung inyakdir, yimjak nung tuteta condemn asütsü.
- Election mapa shi, amtsük, süoshi, blanket, mobile phone, etc yimya balala nung lemyonga aruba memelatsütsü.

Otembang

ABAM-i anir Tsüngrem tenzükertemi kanga meranga clean election atema inyaka arudagi. Ochi ola adokba, ibai temenen mapa ya ayimoktsüba jagi asen lima yanglushiba nung shilem agir ta metetdi. Anungji lenir Temjen Tzüdir-i ayokzüka ama (a) Iba election maparen majungba ya tebang agi dang jembiteper mayutsü merangdi. (b) YSS züngsem shiai nübur kar dangbosa tamajungba nungi pilaa alitsü sayutetdi mesüra angatetdaksüdi. (c) ABAM nung lenirtemi tang nungi shisa sentong tajungba yanglutsü merangdi. (d) Arogo shia Pastori anir toklang tenzükertemi pei Arogo nung yimsüsürtem nem tangatetba shitak agüja nungdak süra election mapang ochi shia shilem agitsü Tsüngrem den tenangzütepa yudaksüdi (takoktsü süra Laishiba nung nemeta). (e) Asen kübok Arogo nung santen kibong shiai tua Election nung ochi shia shilem agitsü angatetdaksüdi aser kokra Tsüngrem den tenangzüktepa tajung yudaksütsü Tsüngrem tenzükertem khuret südi.

Hau lokti nung yimyim ayimbajia junger saka joko kibong shia aser nisung shia dangi tonga mora temeshi sabang aser salang nungi ayimtenba yabo asen nübur asoshi yimya ka amai dang kümogo. Anungji parnok nisung shia dangi tonga odi. Asenoki sentong aika atonga inyakdangogo aser jembidangogo saka sen aser yi tsüngdang nungi jenpur aika mali. Anungji joko lokti nungjia maneni inyaksü saka talisa kija shia dangi tonga oa inyakdi, jembidi, angatetdaksüdi.

- Yimozülur dangi-

Ao Oshi Suiren kakat

- P. Alem Jamir

Tang C. Walu Wallingi zuluba kakat 'Ao Oshi Suiren' nung ya tongtibangsa Ao oshi dak sendakba tejen otsu zuluyu (records) aika tejangja zulua lir. Yangi shia aliba zuluyutem yagi tongtibangsa tarutsu nung asen kin lanusensortem kanga yaritsu ta bilema zungogo.

Ao oshi zulutsu asoshi shirnoki kodang nungi tenzüka sayu, kum kwika agia shisadanger Ao o zulutsu asoshi Roman yakjang amshitsu lemtet, Ao oshi suiren (Ao oshi yashi koda liasu, Tanu koba jenjang nung lir aser Asung tia indang) iba kakat nung zulua lir.

Ashiko tarutsu nung tip jara ajak pakzüka orr kulen alima nung Ao oshi jenjang sensena akumba mapang lanu asensortemi asen oshi kimung shilua bushidi asunung iba kakat nung aliba zuluyu ya medeni asen oshi otsuji mabensatsu sudi ta bilemer. Tongtibangsa Arogo aser kaketshirtemi ayuba kaketnang ajak nung iba ya rizunga yutsura tarutsu nung iba jagi asen lanurtem kanga yaritsu ta bilemer.

Asen kin asoshi milen ka ama kakat tajung zulua yutsüba atema asen lenir dang kanga pelar aser tenungsang agutsur. Maneni Naga nunger lungzuk asutsu asoshi Tsungremi kakat zülur takum temjena moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sri Lanka nung Easter nü amakba UN dang bushisüngdangtsü mepishir



February 28, 2022 nü Vatican nung Sri Lankan Arogo Cardinal, Malcolm Ranjith-i Pope Francis ajurua senden amendang tangokba noksa nung angur.

March 09, 2022: Sri Lanka nung Arogoi United Nations (UN) dang 2019 küm Easter Sunday nü Tenla ki asem amakba tatalokba bushisüngdangtsü mepishio.

March 7, 2022 nü Geneva nung 49buba UN Human Rights Council (UNHRC) senden nung jembidang Sri Lanka Arogo nung Cardinal, Malcolm Ranjith-i, mezüng bushisüngdangba ajangabo Easter Sunday nü amakba ya Islam yimsü alia amanger kiralongrar kari amakba lir ta jangja, ajisüaka iba sülen jungjunga bushisüngdangba ajanga, iba ya yimtenren dak sendakba asalentong ka liasü ta bushitetogo, ta metetdaksü.

Arogo aser lokti tentetemi iba tatalokba jungjunga bushisüngdangtsü atema aiben mepishia aruogo, ajisüaka Sri Lanka nung tang aliba sorkari takoksa angurtem nem ochi temeden magütsür, ta Ranjith-isa metetdaksü.

Iba lendong nung takoksa angurtem nem ochi temeden agütsütsü atema UN-i tiyongtsüü aita inyakdaksüner, ta pai mepishi.

"Iba tatalokba kuli ochi jungkai adokdaksütsü aser aibelenertem anema ken o

akatsü melen ochi temeden bushirtem ang merenshir aser amokmerener," ta pai ashi.

Tesüiba ita ishika iba tatalokba ken o bushisüngdangba dak sendakba nung meimchir temeden atema inyaker, Shehan Malaka Gamage-i, iba tatalokba ya yimtenren dak sendakba asalentong ka liasü, ta yimjak nung jembiba atema Criminal Investigations Department-i pa puogo.

"Ibayongji iba tatalokba sülen küm asem jungaka Easter Sunday nung tatalokba kuli onoki kecha memeteter," ta Ranjith-i ashi.

"Tarutsü nung Tsüngremi ochi jungkai adokdaksütsü ta onoki tamang akar aser Arogoia meranga inyaksü," ta pai ashi.

2019 küm April 21 nü (Easter Sunday) Sri Lanka nung Tenla ki asem aser hotel asem bomb amshia amakba lendong nung tanur 82 aser bendanger 47 densema nisung 269 asü aser nisung 500 dak tema yirua liasü.

Ranjith-isa, iba tatalokba junga bushisüngdang masüba ya meimchir temeden anema lir, anungji yaküm nungi UNHRC-i ketdangsüa kuli

bendenba maparen nung UNHRC züngsem linük ajaki nungita yaridaksüner, ta mepishia metetdaksü.

February 28, 2022 nüa Rome nung Ranjith-i Pope Francis ajuruba mapang nung Easter anogo nung Tenla kitem amakba tatalokba junga bushisüngdang masüba tebilemstü lemsatepa liasü.

Ranjith-isa March 2 nü Geneva nung UN high commissioner for human rights, Michelle Bachelet ajurua kasa tebilemstü lemsatepogo.

Takoksa angurtem rongnung ka- Mary Fernando-i, ochi temeden mangu tashi onoki maneni sarasademba den külemi longkak aittsü, ta metetdaksü.

Mary-i, "Iba tatalokba ken o dak sendakba nung media-i yimtenren lenirtem aser sorkar ketdangsertem tenüng aika jungkai adoktsü tenzükogo," ta metetdaksü.

Ranjith-i, "Tarutsü nung Tsüngremi ochi jungkai adokdaksütsü ta onoki tamang akar aser Arogoia meranga inyaksü. Tang aliba sorkari aibelenertem nem temerenshi agütsütsü ta amanga nübur aikati tan aliba sorkar nem vote agüja liasü," ta metetdaksü.

Uganda nung Muslim nungertemi sayutsüngir ka tepset

Nairobi (Kenya), March 09 (Agencies): Taoba hopta anüdoklen Uganda nung Khristan sayutsüngir kati moapu sentong ka nung sayutsüngiba mapang nung Muslim nungertemi tepset aser tasü mangji rongdoka indok, ta osang ka ajanga metetdaksü.

February 28, 2022 nü Serere district kübok Kadungulu yimdak sayutsüngir, John Michael Okero-i Koran kaket nung Yisu Khrista indang zülua aliba lemsatepba mapang nung Muslim nung Shakuuru-i pa ket nungjagi microphone rakzüka liasü.

Iba sülen Muslim nungertemi Okero-i Allah Tsüngrem mezüngmeshio aser Laishiba kübok ang Koran ayu ta aija pa dak azük.

Parnoki insang, lung aser ajok amshia pa zükset aser tasü mangji rongdok. Sayutsüngir Okero ya arrshi küm 43 liasü.

Pa dak azükba mapang nungji nisung kari police aja saka pa tepsetertem jena aoba sülen ang police iba tesemji tonga aru.

Okero ya Palissa District kübok Kapaala yimdak nungi liasü. Muslim nung nütsüng timba aliba Kadungulu yimdak

sayutsüngitsü atema Khristantemi pa mapang shia jaoka liasü.

Uganda linük temzüng aser tanga ozüngtem ajanga linük nung tamangba yimsü ajak amangtsü aser benshitsü temeden agüja lir. Iba dak alia pei yimsü tangar den lemsateptsü aser yimsü melentsü atema temeden agüja lir, ajisüaka mapang shia Muslim nungertemi Khristantem anema inyaker.

Uganda nung nütsüng shilem 12 dang Muslim nung lir aser parnok timbaka anüdoklen Uganda nung lir.

ANOGO ABEN TSÜNGREM DEN

Chuba putirtem

Nenek teshimetetba kin, chuba putir telok, temeshi kin, aser Tsüngrem pei agitsü purtem nenok lir.

1 Peter 2:9

Na Khristan ka, süra na Tsüngremi shimtetba putir ka lir. Chuba putir ka ama na maneni chuba dangi aotsü leman lapokja lir. Ne taküm nung nüngdak adokra, na atema tetsüngdai air putir ka bushitsü menüngdak. Na chuba putir.

Aji oda süaka putira, pa mapa lir. Putir inyakyim kübok putir kati putir mapa inyaksüla. Laishiba nung putir kati kija inyakyim amshitsü shia mali, pa balaka tenzükba mapa mali. Putirtem külemi mapa inyaker (Lev. 9:1). Lairen masüba kija mapaji Tsüngrem putir kübok pai bilemba mapa nungi pilatsü akok.

Nübur matsüngdang putirji Tsüngrem melen noktakba lir, saka pai ano Tsüngrem dangi nübur tebilemba abener. Na meketa kar Tsüngrem dang mepishitsütsü putir sarasadem nüngdaka lir asü? Karbo ne taküm nung Tsüngrem angu nung dang Tsüngrem metetta arutsüba alitsü akok. Khristaji shidakba taküm lir ta pa nübur taküm agi sayuba alimai nüngdaker. Tsüngremi ajaba dang nungi asen mapa temaba südaktsübaji lendong lir. Asenok mezüngbuba putir asütsü aja, aser tanabuba mapa ka nung sotdaksü aja. Kodang asenoki ibai meinyaklir asen meketa alir ajaki asenok ajanga Tsüngrem dangi aotsü songtemtsü. Tsüngremi secular mapa kati ajatsü akok, saka iba dang nungi talisa na Pa putir ka asütsü shimtet.

Myanmar nung sepaitemi Tenla ki ka poksatsü



Myanmar nung Demoso jila kübok Saun Du La yimdak Fatima Arogo Tenla ki noksa nung angur.

March 09, 2022: Myanmar Khristan putir kati metetdaksü. kübok Kayah state nung Yaküm May ita nungi sepaitemi tayimtsü nungi tenzüka Loikaw nung aliba amakdang bomb ajanga Catholic Arogo kübok sepaitemi Tenla ki ti raksatsüogo. Tang iba Arogo kübok Arogo 38 nungi 16

Demoso jila kübok Saun Du La yimdak sepaitem airstrike nungbo putirtemi anir raksatsü. Arogo lenirtemi Sepaitem aser lisopur sepaitem dang tekülem kitem teloktem tsüngda rara ajanga meraksatsütsüla, ta aiben mepishiaka Khristan nütsüng kitem nung jenoka lir.

UN-i ashiba agi, tawa rara ano tesashiba akümba ajanga Loikaw nung nütsüng shilem 50 shibo jenshiogo aser Kayah state nungi nisung 90,000 shi jenshiogo.

Yangji alirtemi ashiba agi, March 8 anepdang 2:00 ako meta sepaitemi tayimtsü nungi bomb yoka iba Tenla kiji raksatsü. Iba Tenla kidangji nisung aika jenoka lir ta bilema sepaitemi bomb amshia iba Tenla ki amak.

"Tang iba tesem nung rara anenogo, anungji iba ya parnoki asa-a Tenla ki aser tai maket nisungtem anema inyakba lir," ta ngudar.

OLONG PAITEP # 6106

1			2			3		4		
					5					
		6								
							7			
		8								
9										10
				11		12				
13										
14						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 6105 TELANGZÜBA

TIPILEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong, 6. Lungkak,	
10. Tsünpang, 11. Tesangwa,		7. Milak, 9. Zünga, 10. Temopu,	
13. Aoksa, 15. Putir, 16. Yipru.		12. Walu, 14. Ali.	



SCHOOL KA NUNG :

- Missla** : Yima aor aser tetsüng tepen aliba ana züluang.
- Sobangba**: Süngojung, (Flying squirrels) la-a (Bat).
- Missla** : Sobangba 100% right answer.
- Alokba** : La-a, kotak tenyar (angel)
- Missla** : Ari Alokba kotak tenyar ya kong angu aser shibai sayu!
- Alokba** : Süngojung ya ni yimtaka mangu, town nunga mangu saka la-a nikong tang angur, ano kotak tenyarji onok Sunday school kaket nung missla-i sayuba angu.
- Missla** : Oh Alokba.

Lilir : WhatsApp

TANÜBO NAI LANGZÜANG

Q. 'Financial Action Task Force' indang Grey List nung linük koba bendenlok?
 [A] Belarus [B] Russia [C] UAE [D] Ukraine

_____ (Taruba adok nung onoki langzüsü)

YASHI ADOK TELANGZÜBA : Sri Lanka

AO OSHI ANGAZÜKDAK:

TANÜ ANGAZÜKTSÜBA OJANG



Mertep

(v) aiür asangur ajinütepa meimtep (romancing)
 * Narola o Asangba na kanga **merteper**.

Mertsüng

(n) alu inyakdang ali tusaba oset (hoe, mini spade)
 * Aluyimertemi alu atendang aser menti azüngdang **mertsüng** amshir.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

Happy Birthday

TENÜNG : IMLIJUNGLA TZUDIR
 Tasoba anogo : March 10
 Küm : 11
 Talidak : Dimapur
 "Happy birthday Ajungla. Ano küm tasen ka tenzükdang, Tsungremi na maneni maojangma."
 With love,
 Otsü & Obou.

SUDOKU # 6145

TELANGZÜBA # 6144

3	9			1	7				7	2	3	1	4	5	6	8	9	
7		4						2	8	9	4	6	2	3	1	5	7	
2				5		9	7		6	5	1	7	8	9	2	4	3	
	7	9			2	8	3	1	5	1	8	4	9	2	3	7	6	
5						6			3	6	2	8	1	7	5	9	4	
		6	8		4				9	4	7	5	3	6	8	2	1	
8		2			3	7			1	3	5	9	7	8	4	6	2	
	1				9	8	5		2	8	9	3	6	4	7	1	5	
		7						8	6	4	7	6	2	5	1	9	3	8

OJANG LUTEP # 5691

- OCTAHI :
- ETMAK :
- SUNNIG :
- JIDANG :
- MENTEEN :
- NGNISU :
- ATSAJÜ :
- EMSTETÜ :
- AIAM :
- EMEBILR :

OJANG LUTEP TELANGZÜBA # 5690

**TANGAR AZÜOKTSÜ MELEN TAMASA PEI
 INYAKSANGSHI ASERJEMBISHINÜ AZÜOKTSÜ MERANGANG**

TAN HOPTA ATEMA - KOMA SÜLA ?

Q. Center government-i aginüba ama, tendanga, Nagaland nunga tetsürtem atema menden 33% shiteta yutsür municipal aser town council election agi nunga koma süla ?



Kolkata, March 09, 2022: Bodhbarnü Kolkata nung Association for Protection of Democratic Rights (ADPR) züngsemtemi Russia-i Ukraine amakba anema longkak aitba noksa nung angur.

Tanü state pongu nung votes zünga election osang sangdongtsü

New Delhi, Metsüremi/ March 09 (Agencies): State pongu nung assembly elections agiba votes Brihostibarnü azüngtsü atema ketdangser 50,000 dak atema yokogo.

Uttar Pradesh, Uttarakhand, Goa, Manipur aser Punjab state tem nung anepdang 8:00 ako nungi tenzüka vote azüngtsü. February 10 nungi tenzüka March 7 tashi nung shilem tenet lemsar state pongu nung ya election agia liasü.

Counting halls 1,200 amenokogo aser Electronic voting machines (EVMs) nungi

votes ji zünga election osang sangdongtsü.

Uttar nung assembly menden timba- 403 lir, ibayongji UP nung counting halls 750 dak tema amenokogo aser Punjab nunga counting hall 200 dak tema amenokogo.

State pongu nung votes azüngba inyakyim ajak ketdangsia reprangtsü atema counting observers 650 dak tema lezmüksü.

Tang coronavirus wara aliba dak sendakba nung Election Commission-i tetuyuba kar agütsüogo; counting halls ajak nung jelia mozü-tzü aintsü,

nisung pilaa alitsü atema counting halls ji tulu asütsüla, mopung sadema aodak alitsüla, kichiba peria alitsüla aser exhaust fans alitsüla.

Vaccine dose anaprong agir liaka nisung kar dak danga Covid temaitsü lira, pa/la counting hall telungi meyoktsü, ta EC-i metetdaksü.

Counting officials aser security sepai ajak nem mask, sanitizers, face shield aser hand gloves agütsütsü aser counting hall shia nungji counting table tenet tashi dang ayutsüla, ta Election Commission-isa metetdaksü.

Goa nung Congress-i candidates ajak resort ka nung pudenogo

Panaji, March 09 (Agencies): 2017 küm Goa assembly election nung Congress-i menden timba ngua liasü, saka parnoki sorkar mekümtetba nung ajemdaker tanbo March 10, 2022 nü assembly election votes azüngtsü lia Congress-i candidates ajak Panaji anasa Bambolim nung aliba luxury resort ka nung pudena yuogo.

Goa nung party ka kijai sorkar akümtsüsa menden peria menguteter, ibayongji election osang sangdongba sülen party temi tanga party mesüra independent MLA tem teyari bushir. Ajioda Congress-i par candidates tangar nem memesüzükdaksütsü atema pudena yuogo.

Bodhbarnü Congress lenir kati, Brihostibarnü candidates karbo counting centre

sem dangtsü atema-a memelatsü, ta metetdaksü.

Tang-a Goa nung hung assembly (sorkar akümtsü atema shingaia menden peria mengutetba) asütsüa akok, ta asadantetba nung ajemdaker Mongolbar nikongdang Congress-i candidates ajak state yimtiba, Panaji nungi kilometer 5 shi pilar aliba resort kati anir ao.

Congress lenir kati, "Shisabulutsüsa lir. Ibayongji candidates ajak ki ka nung külemi ayur. Asung candidates karbo counting centre sem dangtsü atema-a memelatsü. Parnok melen parnok indang counting agents dang yoktsü," ta metetdaksü.

Goa nung assembly menden 40 lir, aser 2017 küm election nung Congress-i menden 17 tashi nung takok ngua liasü saka

yaküm tashi nungbo Congress MLA 2 dang anüing, iba nungjagi tansür tangbo Congress-i jelia asalentong balala yanglur inyaker .

Tan election nungbo TMC aser AAP-ia toktepogo.

February 14 nü Goa assembly election jakdang Congress-i candidates 37 nem party toktsür tanga nung madentsü nangzükdakja affidavits nung sign südakja liasü.

Congress-i candidates ajakji Hindu nung tekülem ki ka, Tenla ki ka aser Muslim nung tekülem ki kati anir oa affidavit nungji sign südakja liasü.

Goa election osang sangdongtsü lia Congress-i AICC Goa election in-charge, P Chidambaram aser Goa desk in-charge, Dinesh Gundu Rao na jelia Goa-i yoka liasü.



Patiala, March 09, 2022: Bodhbarnü Patiala nung AAP nungi Chief Minister candidate, Bhagwant Mann den party nung inyaker temi Punjab Assembly election indang EVMs yua aliba tesem- Government Mohindra College sem dangba noksa nung angur.

Kobi melii petrol aser diesel totzü jenjang sashia atutsü

New Delhi, March 07 (Agencies): Uttar Pradesh densema state pongu nung assembly election atongtsü mapang nungi tenzüka tang tashi nung ita pezü dak tali petrol aser diesel jenjang matuba ajanga oil companies takoksa jenti nguogo, ibayongji oil company temi kobi melii petrol aser diesel jenjang atutsü renemdar, ta osang ka ajanga metetdaksü.

Tesüiba küm 13 tsüngda International oil jenjang tang timba tua tang totzü barrel ka nung dollar sen 140 kümogo.

West Texas Intermediate crude futures, US oil benchmark-i Amongnü nikongdang barrel ka nung dollar sen 130.50 tashi tua liasü, aser ibaji 2008 küm July ita sülenbo tang timba lir. Brent crude oil barrel ka nung dollar sen 139.13 tashi atu, aser ibaji 200 küm July ita sülenbo tang timba lir. Iba dak alia India nung sen, rupee-a ano jenjang tamajungba küma Hombarnü (March 7) dollar 1 kaji India nung senbo 77.01 kümogo.

Taküm totzü jenjang shilem 60 dak tema tuogo, iba denji külemi India nung sen jenjang ano tamajungba akümba ajanga linük rongsenkettsüing mejungi kongshitsü, rongsenkettsüing

jenjang asüngsashiba tsütsü timtem ajangshitsü aser osettsüset jenjang kanga atutsü.

Takoksa menoktsü atema petrol aser diesel litre shia nung sen 15 atutsü nüngdaker, ta industry osang ajanga metetdaksü.

2017 küm nungi tenzüka anogo shia totzü jenjang reprangshir saka yaküm November 4 nungi tenzüka totzü jenjang metui liasü.

India nungeri alizükba crude oil barrel ka nung dollar sen 111 kümogo (March 1 nü), ta Oil Ministry kübok Petroleum Planning and Analysis Cell (PPAC)-i metetdaksü.

Ita pezü tejaklen India nungeri alizükba crude oil barrel ka nung dollar sen 81.5 dang liasü.

Industry nungi ketdangser kati, "Hombarnü assembly election tembangogo, anungji anogo shia totzü jenjang reprangshia latettsü atema sorkari fuel retailers nem temelaba agütsütsüa akok," ta metetdaksü.

Ajisüaka oil company temi takoksa menoktsü atema khenyongi sen aika matutsüa akok saka anogo shia litre ka nung poisa 50 den tajemba atutsüa akok, ta osang angazüker.



March 09, 2022 nü New Delhi nung Chief of Army Staff, General Manoj Mukund Naravane-i Australia Army Chief, Lt Gen Rick Burr ajurua salemdang tangokba noksa nung angur.

Rajiv Gandhi tepsetba ken o nung SC-i Perarivalan nem bail agütsü

New Delhi, March 09 (Agencies): Bodhbarnü Supreme Court (SC)-i A G Perarivalan nem bail agütsüogo; Rajiv Gandhi tepsetba ken o nung aija alisang ya taküm piyong tepuokdak ayutsü obendang agüja jail nung lir.

Justices- L Nageswara Rao aser B R Gavai nati akümba bench-i pa küm 30 dak tema tepuokdak aliba aser jail telung nung junga aliba den külemi pa khenpiga chiokba mapang nunga pai junga aliba nung ajemdaker pa nem bail agütsü.

Arrshi küm 47, A G Perarivalan-i MDMA bushisüngdangba metembang tashi iba ken o nung pa taküm piyong tepuokdak ayutsü obendang agüja alibaji anenja


atadaksüner, ta Supreme Court dang mepishia liasü.

1991 küm May 21 aonung Tamil Nadu kübok Sriperumbudur nung election lokti senden ka nung tetsür ka tenüing agi, Dhanu-i bomb pokdaksüba lendong nung Rajiv Gandhi pokseta asü.

Iba tatalokba nung Dhanu densema nisung 14 asü.

1999 küm May ita nung Supreme Court-i iba ken o nung aija alir pezü- Perarivalan, Murugan, Santham aser Nalini nung nem tasüba temerenshi agütsütsü obendang agüja liasü saka 2014 küm February 18 nü Supreme Court-i Perarivalan den Santhan aser Murugan nung temerenshi ajemja taküm piyong tepuokdak ayutsü obendang agütsü.

South Korea nung tir tasenba atema election agir | Australia PM-i linük anüdoklen national emergency sangdong



Seoul, March 9, 2022 : South Korea nung March 9, 2022 nü tir election agiba mapang tetsür kati la indang vote agütsüba noksa nung angur. South Korea indang tir tasenba shimtsü asoshi polling ya Bodhbarnep 6:00 ako nung tenzük aser nikongdang 6:00 ako nung tembang. Iba election nung nüburtemi polling station 14,464 nung vote agütsü.

Seoul, Metsüremi/March 09 (Agencies): South Korea nung tir tasenba shimtsü atema Bodhbarnü vote agütsür.

Tir tasenbai telemsa tali adoka aliba, tanur ajema asoba, ki-o-jen nung sen tali akumba aser nuclear aliba North Korea nungi amokmerenba tebilemstü nung ajemoktsü.

Asia nung rongsenketzung tsütsü tulutiba jenjang pezü buba nung aliba linük nung tir meden asoshi tejangja nübu ana tokteper - tang yimsü tesüdüng Democratic Party nungi Lee Jae-myung aser People Power Party nungi taoba mapang chief prosecutor inyaka alisang Yoon Suk-yeol.

Tena ya tang teinyakdak Tir Moon Jae-in melentsü asoshi tokteper, shiba kümsük tanabuba tir inyaktsü asoshi constitution agi memelar. Iba election nung takok angusangi

küm pungo kümsük ka ya May 10 nungi tenzüksü.

Taoba hopta tir menden asoshi tokteper People Party nungi jenjang tasembuba nung alisang Ahn Cheol-soo-i metokteptsü sangdonger Yoon busenba ajanga exit polls nung Yoon ya jenjang tajungba sayur.

Embrain Public ajanga survey ka agiba nung Yoon-i vote shilem 47.4 aser Lee-i shilem 41.5 angu aser Ipsos poll nunga tena tsüngta shilem 48.9 aser 41.9 liasü.

Taoba mapang prosecutor general inyaksang Yoon-i ochimashi, foster justice anema nokdaksü, asayadak tesem tali yanglutsütsü nangzük aser North Korea tsütsü tesashiba nung nokdaksü aser China den tesendaktep asendenshitsu meranger.

Lee ya linük nung nütsüng yongsük timtiba aliba Gyeonggi

province indang governor liasü aser pai coronavirus tashidak den kanga sashia raraba aser universal basic income asoshi inyakba ajanga nungtugu akum.

Küm aika tejakdang Yoon kinungtsü tesayur mapa inyaktsü atema resume meshidak amshiba atema pai tatok meshia liasü. Pa kinungtsü tetsüi mangatetep aliba ali ken o ka nungi rongsen jenti ajanzük aser Yoon inyakba office ajanga bushisingdangba bank ka nungi sen US dollar million aika apu, ta tai tonglokja aliba pai magizük.

Ano külen Lee-ia par jabasoi ozüng alema sen sayiba atema tatok meshia liasü. Pai provincial employee ka pa kinungtsü teyarir ka ama ozüng alema anir arua pa indang corporate credit card tem amshia lai sorkar indang senotsü meshidaki amshi ta tai tonglokja lir.

Ukraine aser Russia foreign minister senden amentsü

Kyiv, Metsüremi/March 09 (Agencies): Russia Foreign Minister Sergey Lavrov den senden amentsü aliba nungi teimla kangabo mali, ta Ukrainian Foreign Minister Dmytro Kuleba-i ashi.

Kuleba-i video sangdong ka nung tena ya Turkey nung Bresthostibarnü ajuruteptsü ta ashi aser Lavrov dang tangatetba tajung nung jembitsü ajungshia liasü.

"Saka iba senden nung kü teimla kangabo mali ta ni pokbaa ashir. Onoki ceasefire janrar, asen litsü talenba nungi salaner aser humanitarian tebilemstü ajak angatetepner," ta pai ashi.

Egypt Tir Abdel Fattah el-Sisi aser Russia Tir Vladimir Putin na Ukraine atema jembishinü aka, ta Egypt tir indang office ajanga ashi.

Tena phone ajanga jembiba mapang el-Sisi aser Putin nati linük ana tsüngta tesendaktep tali akangshitsu indang jembiba liasü, ta ashi.

Russia-i Ukraine amakba aija taoba hopta New York nung aliba UN headquarters nung züngsem linük 141-i vote agütsüba rongnung Egypt ya liasü.

Iba taitsüba anema UN züngsem linük pungoi vote agütsü aser linük 35-i shilem magi.

Bodhbarnüa Ukraine Tir Volodymyr Zelenskyy-i par linük kumzuka ayutsü atema no-fly zone ka amenoktsü memolungra, nüburtem asüba ya linük balala khuret asütsü, ta ashi.

Zelenskyy-i anogoshi television ajanga jembiba arur aser Bodhbarnü jembiba mapang, Russia-i amak tenzük hopta ana jungnüa arudang Ukraine nung lendongtsüdong jenjang tematiba nung lir saka Ukraine nung temolung majemer, ta ashi.

"Onok anema, civilian anema, ozü yimtitem anema aser ozü ki-o-jen anema Russia nungeri missile, aircraft aser helicopter tem amshir. Alimai telangzüba agütsütsü meimchir mapa lir," ta pai ashi.

Ajisüak United States aser United Kingdom densema Kyiv tembar linüktemi Ukraine nung no-fly zone sangdongtsü memolungra.

KAsa mapang Warsaw-i Ukraine nem MiG-29 fighter jet tem agütsütsü renema lir, saka NATO ajanga agütsütsü, ta

ka jakdang nisung kar adenshia longkak aita liasü.

Lismore, Metsüremi/March 09 (Agencies): Australia anüdoklen tzükum anasa tzümetsüng tesashi adokba ajanga national emergency sangdong aser Ato Kilonser Scott Morrison-i item tesem semdanga jajaba mapang longkak aiter ajurua liasü.

Australia nung 2019 küm morok mi tulu adokba sülen renemba emergency sangdong yagi red tape ajemba nung yaritsü aser tzümetsüng adoka alidak tekeraba nung teyari agütsütsü, kong nisung 21 takum samaogo.

Morrison-i tzümetsüng agi teraksa tulu agüja aliba Lismore yimti semdangba mapang longkak aitertemi teyari tali agütsütsü akhang aser tzü-mopung wazüka ayutsü asoshi mera tajungba agitsü akhang. Iba yimti anüdoklen tzükum nung hopta ana jungnüa tzümetsüng kanga sashia adoka lir.

Longkak aitertemi "Onok teyari nungdaker!" ta ayimtena liasü aser aikati placards nung "Mijang aser gas ajanga iba ya ataloker" aser "Tzü-mopung melenbaji yamai lir" ta zülua bener liasü.

Morrison-i semdangba emergency operations centre

Bodhbarnü tzünglu aruba ajema akumdang anüdoklen tzükum tsütsü tzümetsüng arema akum, saka Sydney anüolen tsütsü Hawkesbury River aser linük nung yimti tulutiba aser New South Wales state yimtiba densema tesem kar nung tzümetsüng tulu adoktsü tekum dangtsü sangdonga liasü.

Küm ka nung tzümetsüng tesashi anaben adokba junga ketdang mesütetba atema aitsüba mapang Morrison-i par sorkar bukuma jembi aser 2050 tashinung net-zero greenhouse gas emissions takok angutsü bendanga agütsür inyaker, ta ashi.

Morrison-i osangbener den jembiba mapang, tzü-mopung melenba ajanga iba timtem ya ajuru aser taoba mapanga morok mi adoka liasü, ta ashi saka teinyaktsü tulutibaji danga linüktem nungi mokozü tamajung adokba ajemdaktsütsü ya lir, ta ashi.

Australia nung mokozü tamajung adokba tali azüokba agi masü saka tzümetsüng madoktsüsa mapa inyakba agi nüburtem kumzüksü, ta pai ashi.

Russia-Ukraine tsüngta yimjung ken o jembidaktsüner: Jinping

Beijing, Metsüremi/March 09 (Agencies): Russia-i Ukraine amakba sülen China Tir Xi Jinping-i akok tashi atsü-anem akatsü ajungshi aser Europe nung rara milak tanaben jangurba ngua Beijing temolung shiranger, ta ashi.

France Tir Emmanuel Macron aser German Chancellor Olaf Scholz den Mongulbarnü virtual meeting ka nung jembiba mapang, Russia aser Ukraine tsüngta yimjung ken o jembiba nung linük aseme lungjemer nungitsüla, ta Xi-i ashi.

Ukraine tensa atema kanga shisabulur aser mezüngbuba nung tali tamajungba mekum daktsütsü mesüra mazüokteti modaktsütsü atema

bilemstüla, ta China leniri ashi.

Iba rara ajanga tensa mejungi akumba ajemdaktsütsü aser France aser Germany nati merangtsüla aser tenokdangba agütsüba ajanga alima rongsenketzung, energy supply, senzüsempingba aser supply chain nung kongshitsu, ta Xi-i ashi.

"Chancellor Scholz, Tir Macron aser Tir Xi nungertmi rara adoka aliba nung tangatetep kati arudaktsütsü asoshi nungitsü molungtep," ta German sorkar indang odongtar kati sangdong ka nung ashi.

"Lenir aseme nüburtem nem teyari agütsütsü aser rara adoka aliba tesemi otettsü atema jembi.

(Maneni tapak 9 nung...)



Chernihiv, Mar 9 : Ukraine nung Russian Special Military Operation tenzük Bodhbarnü anogo 14 ajungdang Chernihiv nung army gari teraksa ka tangokba noksa nung angur.

Küm 75 Ajungba tepela salem



WB. NUNGSHIWATI LONGKUMER (LONGSA)

Tensa, mapang aser yimya den liromedema litetbaji takoker taküm ka lir. Tanü küm 75 abensadang Tsüngrem nem tenüngsang agütsür. Tesüngjem, tepela aser anema aliba den arishi talang sükklojang ta onoki maneni sarasademtsür.

Happy Birthday!

**Temiem Kinungtsü, Chirnur,
Anükapang aser Semchirtem.**

OFFICE OF THE LONGCHARI KIDONG CHANGKI CHANGKI : NAGALAND TENÜNGSANG AGÜTSÜR

Changki Longchari Kidong-i kanga nema danga aser tepela nung asür Chubatemsü aser asür Mayangchitla na jabaso **L. Sunep Longchari**, Department of Agriculture, Govt. of Nagaland nung Joint Director jenjang ajangzüktetba atema tenüngsang tetushi agütsür.

Longchari Kidong-i pa tarutsü tajungba ka asoshi imlaja aser sarasademja atar.

**Sd/-
Sademtsüngba
President**

**Sd/-
Asemwati
General Secretary**

ALI AYOKER

Foothill leman touch nung Niuland matongtang 100 x 100 nung Rs. 3,50,000/- fixed aser kipong noklang tema agi alia lir. Tang plot eshika dang anünga lir. Taginer ali nungbo **Contact number: 9856122663**

Russia-Ukraine tsungta... (Tapak 8 nungi...)

Iba rara tatem Mongulbarnü ashi. kumdaktsütsü asoshi linük "Tir Xi aser China asem indang foreign minister lenirtemi Ukraine nung temi shisa agitepa inyaktsü," atalokba ngua parnok ta ashi. temolung anisüngzük mangur ama ni bilemer. Russia-i iba tashi tetsükdaktsü ajurutsü

Russia-i Ukraine amakba China-i aitsütsü memolunger aser Russia nem ozüng alema tenokdangba balala agütsür, ta ashir.

Taoba ita Beijing Winter Olympics tenzüka sentong nung Tir Vladimir Putin arua aden aser kasa anogo linük ana tsungta tesendaktep nung tatakzük maka, ta sangdonga China ser Russia tesendaktep tali akangshi, saka Ukraine nung rara tali tamajungba akumba ajanga China nüma metenteter.

Russia-i Ukraine amakba nung timtem ajuruba aser iba rara ajanga United States aser Europe tali lungjemshiba ngua Xi temolung nung anisüngzük mali amai bilemer, ta CIA indang director-i

temolung anisüngzük mangur ama ni bilemer. Russia-i iba tashi tetsükdaktsü ajurutsü parnoki imla meliasü," ta Central Intelligence Agency tekolakba, William Burns-i US nung ozüng yanglurtem dang shia liasü.

Burns ya küm 30 shi diplomat mapa inyaka aru aser taoba mapang ambassador to Moscow liasü aser pai US House panel dang ashiba agi, China lenirtemi Tir Putin den tesendaktep tajung aliba ajanga parnok tenüng menükba atema bilemer.

Russia-i hopta ana jungnüa Ukraine amakba mapang nisung 4,000 shi asü-ama tia ajuruogo, ta Pentagon-i asadangteta lir aser Ukraine sepaitemi tasü ita nokdaktsü meimla.

Nagaland kübok tesem balala nung International Women's Day mungogo



Dimapur, Metsüremi/March 9 (TYO): KROS College Women Committee-i ayongzüka March 8 nü International Women's Day mungogo.

Sentong nung Additional State Protocol Officer, Nagaland, Meripeni Zares Ezung-i sentepa aliba lokti ayongzüka o jembiba mapang, tetsür aser tebur na tsüngda atangji tebandang aliba, lokti nung tetsürtem kodang beshir aser tebandang aliba koda melenshitetsü, item indang jembiba liasü.

Sentong nungsa tetsürtem nem sempet agüja liasü. Maneni KCSC tir-i "Breaking the Bias" omen nung ajemdaker sangro ka azüng aser Marienla-i ken tajung ka tena lokti ayongzük.

Kasa mapang nung alima ajunga den jangyu medema Pfutsero Government College nunga March 8 nü 'Gender Equality today for a Sustainable Tomorrow' omen nung ajemdaker International Women's Day mungogo.

Iba sentong ya Chakhesang Mother's Association, Chakhesang Women Welfare Society aser Indian Social Responsibility Network den District Administration-i ayongzük aser Women Cell, Pfutsero Government College host süa agiogo.

Iba sentong nung Joint Secretary Avelu Ruho, NCS alakteta jaoker liasü. Lai

tetsürtem dang policy yangluba nung shilem agitsü ajungshiba den ken o karbo tetsüri dang arok arok ia angateter, ta shia süngjem süngjema iba atema nokdaktsü ajungshi.

Sentong nung Pfutsero Government College Principal, Dr. Bwenyuhle Khing-i lokti pela agizükba o jembiba aser EAC (probationer), Er. Kilangtemsu Walling-i okilao jembiba. Kibong nung tetsür tebur na liromedema ainba indang saya ka English Department-i saya. Maneni iba sentong nungsa omen dak ajemdaker o jembitepba tetoktepba ka ayongzüka agi. Iba tetoktepba ya Zocheu Thele-i akok aser tanabuba aser tasembuba jenjang nung Chovelu D. Vadeo aser Khruvi Victor Zholia na liasü.

Chakhesang nung sobaliba sobutsütem teratet aser saya sentong ka Chakhesang Mother's Association-i achayanga agia liasü.

Maneni Kiphiri nunga "Gender Equality Today for a sustainable Tomorrow" omen nung ajemdaker March 8 nü DC's conference hall nung International Women's Day mungogo.

Sentong nung o jembiba mapang EAC, Chubamongla Kichu-i, tetsürtemi shilem agiba ajanga environment nung temelenshi bener arutetsü ta ashi.

Laisa omen dak ajemdaker

ashiba agi, nütsünyongsük shilem 50 bo tetsür lir aser sustainable development atem aser environment nung temelenshi atema tetsür aser tebur napronglai kasa shilem agitsü nüngdaker ta ashi.

EAC-isa, International Women's Day ya yimden yimsüsüba, loktilibaren, rongsenketzüng aser sobaliba nung tetsürtemi takok tajung angubatem benjungsü atema ayongzüka amunger ta ashiba den tetsürtem dang rongsenketzüng tsütsü teburtem dak dang metaloker malitsü ayongzük.

Maneni iba anogo naro sayaba tetoktepba ka ayongzüka agiogo. Bloom flowers category tetoktepba Pukhali Sumi-i akok aser Chumila aser Chubala na tanabuba aser tasembuba jenjang nung liasü. Green leaves category nung Thspongchi-i tetoktepba akok aser Tsasela o Supanshe na tanabuba aser tasembuba jenjang nung liasü.

Kasa mapang nung Women Icon Piramal Swasthya (ADC Health) tetushi Thangthure yimsüng nungi Asha Worker Thepila nem agütsü. Ano Horticulture Department-i sentong nung shilem agirtem nem angati free Integrated Nutrient Management (INM) agütsü. Iba sentong ya Coordinator DLCW-Mahila Shakti Kendra, Visuthong T lenisüba nung agia liasü.

C-Edge College-i Japanese Language Program atema graduation sentong ayongzük

Dimapur, Metsüremi/March 09, 2022 (TYO): C-Edge College-i Honibar (05.03.2022) anepdang 11:00 nungi tenzüka Zoom' ajanga Japanese Language Program atema Ibuba graduation sentong ayongzüka liasü, ta sangdong ka ajanga metetdaksü.

Iba Certificate Ceremony nung Er. Moa Aier, President, CEC, Wapanginla Ao, CEC Academic Dean, Apang Aier, CEC HR Director nung den külemi nisung 10 agi shilem agiogo.

2021-22 indang batch nungi kaketshir 5 shi graduate süogo.

Principal CEC, Dr. Chubata Aier-i telok pela agizükba o jembiba aser Japanese Language Program takok angutsü mechi meranga inyakba atema lai kaketshir aser tesayur tem dang pelaba metetdaksü.

Chubatola-i ashiba agi, jenjang tajung ajangzükdaktsütsü asoshi iba reju nükla lir.

Kasa sentong nung Japan Foundation, New Delhi indang Director Yuka Hayakawa-i jembiba liasü. Oshi tasen ka angazüktsü ya tezüba masü, saka nenok (kaketshir) dak angazüktsü tejangra aliba ya tajung aser maneni anagzüktsü asoshi lai kaketshirtem ajungshiogo.

Iba course takok ngua tembangtsü asoshi meranga inyakba atema Yuka-i pelaba lemsatet.

Japan Foundation indang Language Advisor, Yoko Kanagae-i Japanese Language Program nung graduate asür kaketshir ajak nem tenüngsang agütsü.

Iba College nung Japanese

Language Program tenzüka atema lai college danga pelaba metetdaksü aser tarutsü nung course tasen talisa Anime, calligraphy, etc. tem bendenloka agitsü imlar, ta lai lemsatet.

Iba sülen, Japan Foundation Director, Hayakawa-i E-Certificate tem lema agütsü.

Jenjang ka ajangzüktetsü asoshi kaketshirtemi meranga inyakba aser iba den külemi oshi tasen angazüktsü jangraba atema Neetu Jain, Language teacher, JLP-i kaketshir dang pelaba metetdaksü.

Maneni, kasa sentong nung kaketshirtemi course agiba mapang ajangshibattem lemsatet liasü. Iba sentong tembangba Komuni Chache, Coordinator JLP-i tepela anküp o jembiba, ta sangdong ajanga ashi.



New Delhi, Mar 9 : Union Minister for Information and Broadcasting, Youth Affairs and Sports Anurag Singh Thakur den Himachal Pradesh nungi tetsür Kabaddi team New Delhi nung Bodhbarnü tangokba noksa nung angur.

Bayern Munich Champions League quarterfinals-i iogo

Munich, Metsüremi/March 9 (Agencies): Mongolbarnü Red Bull Salzburg den asaya nung Robert Lewandowski-i otsü tasen ka yanglua minute 11 nung hat-trick idaktsüba sülen Bayern Munich-i iba asaya goal 7-1 agi koka Champions League quarterfinals-i iogo.

Asaya tenzüker minute 23 tashi nungbo Lewandowski goal asem idaktsür liasü, koba Champions League asaya ka nung hat-trick takaratiba idaktsüba liasü.

Mezüngbuba leg nungbo Salzburg-i Bayern pur nem takok magütsüi goal 1-1 nung asaya tembang, saka tanabuba leg nungbo Lewandowski-i penalty ana densema goal asem idaktsüba ajanga parnok timla

samadaktsü.

Lewandowski-i goal mezüngbuba aser tasembuba idaktsüba tsüngda mapang minute ter ser second 27 dang liasü. Pai Champions League nung hat-trick trok idaktsür aliba rongnung iba ya takaratiba idaktsüba liasü.

Asaya nung maneni Bayern atema Serge Gnabry-i goal pezübuba, Thomas Mueller-i pongububa aser trokbuba aser Sane-i goal tenetbuba idakja parnoki asaya ayong ayonga akok.

Salzburg atema arishi küm 18 tain Dane Maurits Kjaergaard-i goal ka idakja liasü.

Kasa mapang nung Liverpool pura 2-1 aggregate

nung Inter Milan madak takok nua Champions League quarterfinals-i iogo. Mongolbarnü tanabuba leg asaya nungbo Inter Milan-i goal 1-0 agi Liverpool madak takok nua liasü, saka aggregate nung parnok tsükogo.

Asaya mezüngbuba shilem kanga kümdanga asayatepba sülen asaya tanabuba shilem nung Lautaro Martinez-i minute 62buba nung Inter atema goal ka idakja, iba goal yagi asaya akok.

Telok ana tsüngda kanga toktepa asaya arur Inter puri ano goal idaktsüsü imlaa aliba mapang Alexis Sanchez nem tanabuba yellow card agüja asaya nungi tugudaktsüba sülen parnok jenjang mejungi aküm.

Novak Djokovic Indian Wells draw nung züngoksemogo



Metsüremi/March 9, 2022 (Agencies): Indian Wells asayamung ayongertemi Mongolbarnü sangdong ka ajanga ashiba agi, Novak Djokovic asayamung draw nung züngoksemogo, ajisüaka pa United States-i aitsü melatsü memelatsü mejangja.

Grand Slam 20 ben tashi koker aliba asayar yagi COVID-19 vaccine agitsü memulung aser iba ajanga asayamungtem nung shilem magitetsüsa kümra ajia agizüksü atema pa renema lir ta pai shiogo.

"Novak Djokovic asayamung entry list nung züngoksema lir, anungji pa tanü draw nung züngoksemogo.

Onoki tang par team den tongtepratepdar," ta Indian Wells organizer temi tweet asü.

"Ajisüaka pa iba asayamung nung shilem agitsü atema CDC (U.S. Centers for Disease Control and Prevention)-i pa linüki aiddaktsüsü maitdaktsüsü mejangja," ta parnokisa ashi. Indian Wells asayamung tebur asaya indang draw nung pa mezüngbuba round nungbo bye nung lir.

March 3 nü tashi nung CDC website nung immigrants tem toktsür US lisopur masürtem United States-i tayimtsü ajanga arutsüpurtemi COVID-19 vaccine agiba kuli sayutsü nungdaker ta shia lir.

Djokovic Australian Open nunga shilem magitetsüsa aküm, kechiyong pa immigration authorities-i January 6 nü sota ayu. Australia indang COVID-19 entry rules dak sendakba nung okadak ken o benoka atsütepba sülen January ita tatemlen pa indang visa thitsü.

COVID-19 wara poktetba ajanga Indian Wells asayamung ya 2020 küm athi aser taoba küm October itai belener atu ajisüaka takümbo nüburttem nem iba asayamung reprangdaktsüsü imlar.

Iba asayamung nung tetsürtem asaya Bodhbarnü nungi aser teburtem Brehostibarnü nungi tenzüksü.

Roger Federer yirur masayatetba den Djokovic asayatsü mejangjaba sülen Rafael Nadal-i iba asayamung akoktsü imlar. Pai taküm Australian Open koka otsü tasen ka yangluogo aser French Open-a pai akoktsü imlar.

Djokovic tatemsa February ita Dubai nung asayaago, kong pa Czech nung asayar Jiri Vesely-i quarter-finals nung tsükdakja liasü.

Iba tamakok anguba sülen pa Russia nung asayar Daniil Medvedev nem ajatetdaktsüogo.

Shane Warne atema state funeral March 30 nü agitsü

Sydney, Metsüremi/March 9 (Agencies): Australia nung nungtugu cricket asayar Shane Warne nem Melbourne Cricket Ground nung March 30 nikonktsüsü state funeral ka ajanga tetushi agütsüsü, ta Victorian state government-i Bodhbarnü metetdaktsüogo.

Warne ya Hokolbarnü Thailand kübok Koh Samui tesem nung asü. Pa arishi küm 52 liasü. Pa tasümgang Australia-i bener arutsü. Autopsy agiba sülen pa temulungjang mapa minyaki kuma asü ta jangjaago.

Nungtugu leg-spinner Warne atema state funeral ka Melbourne Cricket Ground nung agitsü aser nüburttem atema ticket lapoktsüogo, ta Victorian government sangdong ajangsa metetdaktsü.

"Warne-i putu ka cricket asayartem ajungmesoba dang masü saka pai iba asaya ya

kechi aji angatetdakja liasü," ta parnokisa ashi.

Warne den asüpila sentong dak sendakba nung inyakyimtem ano tembanga minyaki lir, ta state sorkarisa ashi.

"Warnie den asüpila sentong agitsü atema 'G' dak alia tanga tesem tetemjenba kecha mali," ta Victorian Premier Daniel Andrews-i ashi.

"Shane-i state nem teyari agütsüba aser pai meimba asaya atema bendanga agüja inyakba atema Victorian nungertem nem MCG nung March 30 nikonktsüsü asüpila sentong agiba mapang pa nem tetushi agütsüsü atema maongka agütsüsü," ta paisa ashi.

Warne asüba osang angazüka alima ajunga aoksaago aser linük balala Ato Kilonsertem, rock star tem aser külem asayartemi mang ayimba lemsatepogo.

ICC Test Rankings: Jadeja world No. 1 all-rounder kümogo



Dubai, Metsüremi/March 9 (Agencies): India nung nungtugu cricket asayar Ravindra Jadeja, Bodhbarnü sayaba ICC Test rankings all-rounders list nung temaba jenjangi tuogo. Mohali nung Sri Lanka den mezüngbuba Test asaya nung kanga junga shilem agiba sülen pai iba jenjang tongtetogo.

"Anogo ishika tejakdang Mohali nung Sri Lanka akokba Test asaya nung Ravindra Jadeja-i kanga junga shilem agiba ajanga pa MRF Tyres ICC Men's Test Player Rankings nung temaba jenjangi tuogo," ta ICC-i sangdong ka ajanga metetdaktsü.

Iba Test nung pai out mesür run 175 yangluba sülen pa batsmen tem rongnung jenjang 54buba nung aliba 37bubai atu aser wicket teku agiba sülen bowler tem rongnung jenjang 17bubai tuogo.

Pai bat aser ball naprongla nung kanga junga shilem agiba ajanga all-rounder tem rongnung temaba jenjangi tuogo. Iba jenjang ya 2021 küm February ita nungi Jason

Holder-i maittsüi bener liasü. Jadeja, 2017 küm August ita dang temaba jenjang-i tudanga lir. Iba mapang pa hopta ka temaba jenjang nung liasü.

Mohali nung Sri Lanka akokba asaya nung Jadeja nem player of the match naroküm agütsü. India-i iba asaya innings ka aser run 222 agi akok.

Kasa list nung Ravichandran Ashwin jenjang ka asepzüka lua tasembuba nung lir aser Axar Patel-a jenjang 14buba nung lir. Patel yiruba ajanga Mohali Test nung masayatet.

Batsmen tem rongnung Virat Kohli jenjang ana tejakdangi tua pongububa aser India skipper Rohit Sharma trokbuba nung lir.

Rishabh Pant, shibai Mohali nung run 96 yanglua liasü, pa jenjang 10 tejakdangi tua top 10-i iogo. Batsmen tem rongnung Australia nung asayar Labuschagne temaba jenjang nung lir.

Bowler tem rongnung Ashwin tanabuba aser Jasprit Bumrah 10buba nung lir. Iba list nung Pat Cummins temaba jenjang nung lir.

BILEMDANGANG

"Yimayimpong tamajung memelenshi tashi atsüdaka ayutsü."